

Zakariyāh

Taubā Karo!

¹ Fāras ke bādshāh Dārā kī hukūmat ke dūsre sāl aur āṭhweñ mahīne * meñ Rab kā kalām nabī Zakariyāh bin Barakiyāh bin Iddū par nāzil huā,

²⁻³ “Logoñ se kah ki Rab tumhāre bāpdādā se nihāyat hī nārāz thā. Ab Rabbul-afwāj farmātā hai ki mere pās wāpas āo to maiñ bhī tumhāre pās wāpas āūngā.

⁴ Apne bāpdādā kī mānind na ho jinhoñ ne na merī sunī, na merī taraf tawajjuh dī, go maiñ ne us waqt ke nabiyōñ kī mārifat unheñ āgāh kiyā thā ki apnī burī rāhoñ aur sharīr harkatoñ se bāz āo.

⁵ Ab tumhāre bāpdādā kahāñ haiñ? Aur kyā nabī abad tak zindā rahte haiñ? Donoñ bahut der huī wafāt pā chuke haiñ. †

⁶ Lekin tumhāre bāpdādā ke bāre meñ jitnī bhī bāteñ aur faisle maiñ ne apne ḳhādimoñ yānī nabiyōñ kī mārifat farmāe wuh sab pūre hue. Tab unhoñ ne taubā karke iqrār kiyā, ‘Rabbul-afwāj ne hamārī burī rāhoñ aur harkatoñ ke sabab se wuh kuchh kiyā hai jo us ne karne ko kahā thā.’ ”

Zakariyāh Royā Deḳhtā Hai

* **1:1** Aktūbar tā Nawambar. † **1:5** ‘Donoñ . . . chuke haiñ’ izāfā hai tāki matlab sāf ho.

⁷ Tīn māh ke bād Rab ne nabī Zakariyāh bin Barakiyāh bin Iddū par ek aur kalām nāzil kiyā. Sabāt yānī 11weñ mahīne kā 24wān din ‡ thā.

Pahlī Royā: Ghuṣawār

⁸ Us rāt main ne royā meñ ek ādmī ko surkh rang ke ghoṛe par sawār dekhā. Wuh ghāṭī ke darmiyān ugne wālī mehndī kī jhāriyon ke bīch meñ rukā huā thā. Us ke pīchhe surkh, bhūre aur safed rang ke ghoṛe khare the. Un par bhī ādmī baiṭhe the. §

⁹ Jo farishtā mujh se bāt kar rahā thā us se main ne pūchhā, “Mere āqā, in ghuṣawāron se kyā murād hai?” Us ne jawāb diyā, “Main tujhe un kā matlab dikhātā hūn.”

¹⁰ Tab mehndī kī jhāriyon meñ ruke hue ādmī ne jawāb diyā, “Yih wuh haiñ jinheñ Rab ne pūrī duniyā kī gasht karne ke lie bhejā hai.”

¹¹ Ab dīgar ghuṣawār Rab ke us farishte ke pās ae jo mehndī kī jhāriyon ke darmiyān rukā huā thā. Unhoñ ne ittalā dī, “Ham ne duniyā kī gasht lagāi to mālūm huā ki pūrī duniyā meñ amn-o-amān hai.”

¹² Tab Rab kā farishtā bolā, “Ai Rabbul-afwāj, ab tū 70 sālon se Yarūshalam aur Yahūdāh kī ābādiyon se nārāz rahā hai. Tū kab tak un par rahm na karegā?”

¹³ Jawāb meñ Rab ne mere sāth guftgū karne wāle farishte se narm aur tasallī dene wālī bāteñ kīñ.

¹⁴ Farishtā dubārā mujh se muḳhātib huā, “Elān kar ki Rabbul-afwāj farmātā hai, ‘Main

‡ 1:7 15 Farwarī.

§ 1:8 ‘Un . . . baiṭhe the’ izāfā hai tāki matlab sāf ho.

baṛī ḡhairat se Yarūshalam aur Koh-e-Siyyūn ke lie laṛūngā.

¹⁵ Maiñ un dīgar aqwām se nihāyat nārāz hūn jo is waqt apne āp ko mahfūz samajhtī haiñ. Beshak maiñ apnī qaum se kuchh nārāz thā, lekin in dīgar qaumoñ ne use had se zyādā tabāh kar diyā hai. Yih kabhī bhī merā maqsad nahīn thā.’

¹⁶ Rab farmātā hai, ‘Ab maiñ dubārā Yarūshalam kī taraf māyl ho kar us par rahm karūnga. Merā ghar nae sire se us meñ tāmīr ho jāegā balki pūre shahr kī paimāish kī jāegī tāki use dubārā tāmīr kiyā jāe.’ Yih Rabbul-afwāj kā farmān hai.

¹⁷ Mazīd elān kar ki Rabbul-afwāj farmātā hai, ‘Mere shahroñ meñ dubārā kasrat kā māl pāyā jāegā. Rab dubārā Koh-e-Siyyūn ko tasallī degā, dubārā Yarūshalam ko chun legā.’ ”

Dūsri Royā: Sīng aur Kārīgar

¹⁸ Maiñ ne apnī nigāh uṭhāī to kyā deḡhtā hūn ki chār sīng mere sāmne haiñ.

¹⁹ Jo farishtā mujh se bāt kar rahā thā us se maiñ ne pūchhā, “In kā kyā matlab hai?” Us ne jawāb diyā, “Yih wuh sīng haiñ jinhoñ ne Yahūdāh aur Isrāīl ko Yarūshalam samet muntashir kar diyā thā.”

²⁰ Phir Rab ne mujhe chār kārīgar dikhāe.

²¹ Maiñ ne sawāl kiyā, “Yih kyā karne ā rahe haiñ?” Us ne jawāb diyā, “Mazkūrā sīngoñ ne Yahūdāh ko itne zor se muntashir kar diyā ki ākḡhirkār ek bhī apnā sar nahīn uṭhā sakā. Lekin ab yih kārīgar un meñ dahshat phailāne āe haiñ. Yih un qaumoñ ke sīngoñ ko ḡhāk meñ milā

deṅge jinhoñ ne un se Yahūdāh ke bāshindon ko muntashir kar diyā thā.”

2

Tīsrī Royā: Ādmī Yarūshalam kī Paimāish Kartā Hai

¹ Maiñ ne apnī nazar dubārā uṭhāi to ek ādmī ko dekhā jis ke hāth meñ fitā thā.

² Maiñ ne pūchhā, “Āp kahāñ jā rahe haiñ?” Us ne jawāb diyā, “Yarūshalam kī paimāish karne jā rahā hūñ. Maiñ mālūm karnā chāhtā hūñ ki shahr kī lambāi aur chauṛāi kitnī honī chāhie.”

³ Tab wuh farishtā rawānā huā jo ab tak mujh se bāt kar rahā thā. Lekin rāste meñ ek aur farishtā us se milne āyā.

⁴ Is dūsre farishte ne kahā, “Bhāg kar paimāish karne wāle naujawān ko batā de, ‘Insān-o-haiwān kī itnī baṛī tādād hogī ki āindā Yarūshalam kī fasīl nahīñ hogī.”

⁵ Rab farmātā hai ki us waqt maiñ āg kī chārdiwārī ban kar us kī hifāzat karūnga, maiñ us ke darmiyān rah kar us kī izzat-o-jalāl kā bāis hūngā.’ ”

⁶ Rab farmātā hai, “Uṭho, uṭho! Shimālī mulk se bhāg āo. Kyoñki maiñ ne khud tumheñ chāroñ taraf muntashir kar diyā thā.

⁷ Lekin ab maiñ farmātā hūñ ki wahāñ se nikal āo. Siyyūn ke jitne log Bābal * meñ rahte haiñ wahāñ se bach nikleñ!”

⁸ Kyoñki Rabbul-afwāj jis ne mujhe bhejā wuh un qaumoñ ke bāre meñ jinhoñ ne tumheñ lūṭ

* 2:7 Lafzī tarjumā: Bābal Beṭī.

liyā farmātā hai, “Jo tumheñ chhere wuh merī āñkh kī putlī ko chheregā.

⁹ Is lie yaqīn karo ki main apnā hāth un ke k̄hilāf uṭhāūngā. Un ke apne ghulām unheñ lūṭ leñge.”

Tab tum jān loge ki Rabbul-afwāj ne mujhe bhejā hai.

¹⁰ Rab farmātā hai, “Ai Siyyūn Beṭī, k̄hushī ke nāre lagā! Kyonki main ā rahā hūñ, main tere darmiyān sukūnat karūnga.

¹¹ Us din bahut-sī aqwām mere sāth paiwast ho kar merī qaum kā hissā ban jāēngī. Main k̄hud tere darmiyān sukūnat karūnga.”

Tab tū jān legī ki Rabbul-afwāj ne mujhe tere pās bhejā hai.

¹² Muqaddas mulk meñ Yahūdāh Rab kī maurūsī zamīn banegā, aur wuh Yarūshalam ko dubārā chun legā.

¹³ Tamām insān Rab ke sāmne k̄hāmosh ho jāēñ, kyonki wuh uṭh kar apnī muqaddas sukūnatgāh se nikal āyā hai.

3

Chauthī Royā: Imām-e-Āzam Yashua

¹ Is ke bād Rab ne mujhe royā meñ imām-e-āzam Yashua ko dikhāyā. Wuh Rab ke farishte ke sāmne kharā thā, aur Iblīs us par ilzām lagāne ke lie us ke dāēñ hāth kharā ho gayā thā.

² Rab ne Iblīs se farmāyā, “Ai Iblīs, Rab tujhe malāmat kartā hai! Rab jis ne Yarūshalam ko chun liyā wuh tujhe ḍāñṭtā hai! Yih ādmī to bāl

bāl bach gayā hai, us lakaṛī kī tarah jo bhaṛaktī āg meñ se chhīn lī gaī hai.”

³ Yashua gande kapṛe pahne hue farishte ke sāmne khaṛā thā.

⁴ Jo afrād sāth khaṛe the unheñ farishte ne hukm diyā, “Us ke maile kapṛe utār do.” Phir Yashua se mukhātib huā, “Dekh, maiñ ne terā qusūr tujh se dūr kar diyā hai, aur ab maiñ tujhe shāndār safed kapṛe pahnā detā hūñ.”

⁵ Maiñ ne kahā, “Wuh us ke sar par pāk-sāf pagaṛī bāndheñ!” Chunāñche unhoñ ne Yashua ke sar par pāk-sāf pagaṛī bāndh kar use nae kapṛe pahnāe. Rab kā farishtā sāth khaṛā rahā.

⁶ Yashua se us ne baṛī sanjīdagī se kahā,

⁷ “Rabbul-afwāj farmātā hai, ‘Merī rāhoñ par chal kar mere ahkām par amal kar to tū mere ghar kī rāhnumāī aur us kī bārgāhoñ kī dekh-bhāl karegā. Phir maiñ tere lie yahāñ āne aur hāzīrīn meñ khaṛe hone kā rāstā qāym rakhūngā.

⁸ Ai imām-e-āzam Yashua, sun! Tū aur tere sāmne baiṭhe tere imām bhāī mil kar us waqt kī taraf ishārā haiñ jab maiñ apne kḥādīm ko jo Koñpal kahlātā hai āne dūngā.

⁹ Dekho wuh jauhar jo maiñ ne Yashua ke sāmne rakhā hai. Us ek hī patthar par sāt āñkheñ haiñ.’ Rabbul-afwāj farmātā hai, ‘Maiñ us par katbā kandā karke ek hī din meñ is mulk kā gunāh miṭā dūngā.

¹⁰ Us din tum ek dūsre ko apnī angūr kī bel aur apne anjīr ke daraḳht ke sāye meñ baiṭhne kī dāwat doge.’ Yih Rabbul-afwāj kā farmān hai.”

4

Pānchwīn Royā: Sone kā Shamādān aur Zaitūn ke Daraḳht

¹ Jis farishte ne mujh se bāt kī thī wuh ab mere pās wāpas āyā. Us ne mujhe yoñ jagā diyā jis tarah gahrī nīnd sone wāle ko jagāyā jātā hai.

² Us ne pūchhā, “Tujhe kyā nazar ātā hai?” Maiñ ne jawāb diyā, “Khālis sone kā shamādān jis par tel kā pyālā aur sāt charāgh haiñ. Har charāgh ke sāt muñh haiñ.

³ Zaitūn ke do daraḳht bhī dikhāī dete haiñ. Ek daraḳht tel ke pyāle ke dāīn taraf aur dūsrā us ke bāīn taraf hai.

⁴ Lekīn mere āqā, in chīzoñ kā matlab kyā hai?”

⁵ Farishtā bolā, “Kyā yih tujhe mālūm nahīn?” Maiñ ne jawāb diyā, “Nahīn, mere āqā.”

⁶ Farishte ne mujh se kahā, “Zarubbābal ke lie Rab kā yih paīghām hai,

‘Rabbul-afwāj farmātā hai ki tū na apnī tāqat, na apnī quwwat se balki mere Rūh se hī kāmyāb hogā.’

⁷ Kyā rāste meñ baṛā pahār hāyl hai? Zarubbābal ke sāmne wuh hamwār maidān ban jāegā. Aur jab Zarubbābal Rab ke ghar kā āḳhīrī patthar lagāegā to hāzirīn pukār uṭheñge, ‘Mubāarak ho! Mubāarak ho!’”

⁸ Rab kā kalām ek bār phir mujh par nāzil huā,

⁹ “Zarubbābal ke hāthoñ ne is ghar kī buniyād dālī, aur usī ke hāth use takmīl tak pahuñchāenge. Tab tū jān legā ki Rabbul-afwāj ne mujhe tumhāre pās bhejā hai.

¹⁰ Go tāmīr ke āghāz meñ bahut kam nazar ātā hai to bhī us par hiqārat kī nigāh na ḍālo. Kyonki log khushī manāenge jab Zarubbābal ke hāth meñ sāhul dekheñge. (Mazkūrā sāt charāgh Rab kī ānkheñ haiñ jo pūrī duniyā kī gasht lagātī rahtī haiñ.)”

¹¹ Maiñ ne mazīd pūchhā, “Shamādān ke dāeñ bāeñ ke zaitūn ke do darakhtoñ se kyā murād hai?”

¹² Yahān sone ke do pāyp bhī nazar āte haiñ jin se zaitūn kā sunahrā tel bah nikaltā hai. Zaitūn kī jo do ṭahniyān un ke sāth haiñ un kā matlab kyā hai?”

¹³ Farishte ne kahā, “Kyā tū yih nahīñ jāntā?” Maiñ bolā, “Nahīñ, mere āqā.”

¹⁴ Tab us ne farmāyā, “Yih wuh do masah kie hue ādmī haiñ jo pūrī duniyā ke mālik ke huzūr khare hote haiñ.”

5

Chhaṭī Royā: Uṛne Wālā Tūmār

¹ Maiñ ne ek bār phir apnī nazar uṭhāī to ek uṛtā huā tūmār dekhā.

² Farishte ne pūchhā, “Tujhe kyā nazar ātā hai?” Maiñ ne jawāb diyā, “Ek uṛtā huā tūmār jo 30 fuṭ lambā aur 15 fuṭ chaurā hai.”

³ Wuh bolā, “Is se murād ek lānat hai jo pūre mulk par bhejī jāegī. Is tūmār ke ek taraf likhā hai kī har chor ko miṭā diyā jāegā aur dūsri taraf yih kī jhūṭī qasam khāne wāle ko nest kiyā jāegā.

⁴ Rabbul-afwāj farmātā hai, ‘Maiñ yih bhejūngā to chor aur mere nām kī jhūṭī qasam

khāne wāle ke ghar meñ lānat dākḥil hogī aur us ke bīch meñ rah kar use lakaṛī aur paṭthar samet tabāh kar degī.’ ”

Sātwiñ Royā: Ṭokrī meñ Aurat

⁵ Jo farishtā mujh se bāt kar rahā thā us ne ā kar mujh se kahā, “Apnī nigāh uṭhā kar wuh dekh jo nikal kar ā rahā hai.”

⁶ Maiñ ne pūchhā, “Yih kyā hai?” Us ne jawāb diyā, “Yih anāj kī paimāish karne kī ṭokrī hai. Yih pūre mulk meñ nazar ātī hai.”

⁷ Ṭokrī par sīse kā ḍhakkā thā. Ab wuh khul gayā, aur ṭokrī meñ baiṭhī huī ek aurat dikhāī dī.

⁸ Farishtā bolā, “Is aurat se murād Bedīnī hai.” Us ne aurat ko dhakkā de kar ṭokrī meñ wāpas kar diyā aur sīse kā ḍhakkā zor se band kar diyā.

⁹ Maiñ ne dubārā apnī nazar uṭhāī to do auraton ko dekhā. Un ke laqlaq ke-se par the, aur uṛte waqt hawā un ke sāth thī. Ṭokrī ke pās pahuñch kar wuh use uṭhā kar āsmān-o-zamīn ke darmiyān le gaīn.

¹⁰ Jo farishtā mujh se guftgū kar rahā thā us se maiñ ne pūchhā, “Aurateñ ṭokrī ko kidhar le jā rahī haiñ?”

¹¹ Us ne jawāb diyā, “Mulk-e-Bābal meñ. Wahāñ wuh us ke lie ghar banā deṅgī. Jab ghar taiyār hogā to ṭokrī wahāñ us kī apnī jagah par rakhī jāegī.”

6

Chār Rath

¹ Main ne phir apnī nigāh uṭhāi to kyā dekhtā hūn ki chār rath pital ke do pahāron ke bīch mein se nikal rahe haiñ.

² Pahle rath ke ghoṛe surkh, dūsre ke siyāh,

³ tīsre ke safed aur chauthē ke dhabbedār the. Sab tāqatwar the.

⁴ Jo farishtā mujh se bāt kar rahā thā us se main ne sawāl kiyā, “Mere āqā, in kā kyā matlab hai?”

⁵ Us ne jawāb diyā, “Yih āsmān kī chār rūh * haiñ. Pahle yih pūrī duniyā ke mālik ke huzūr kharī thiñ, lekin ab wahāñ se nikal rahī haiñ.

⁶ Siyāh ghoṛon kā rath shimālī mulk kī taraf jā rahā hai, safed ghoṛon kā maḡhrib kī taraf, aur dhabbedār ghoṛon kā junūb kī taraf.”

⁷ Yih tāqatwar ghoṛe baṛī betābī se is intazār mein the kī duniyā kī gasht karen. Phir us ne hukm diyā, “Chalo, duniyā kī gasht karo.” Wuh fauran nikal kar duniyā kī gasht karne lage.

⁸ Farishte ne mujhe āwāz de kar kahā, “Un ghoṛon par khās dhyān do jo shimālī mulk kī taraf baṛh rahe haiñ. Yih us mulk par merā ḡhussā utāreñge.”

Isrāil kā Āne Wālā Bādshāh

⁹ Rab kā kalām mujh par nāzil huā,

¹⁰ “Āj hī Yūsiyāh bin Safaniyāh ke ghar mein jā! Wahāñ terī mulāqāt Bābal mein jilāwatan kie hue Isrāiliyon Khaldī, Tūbiyāh aur Yadāyāh se hogī jo is waqt wahāñ pahuñch chuke haiñ. Jo hadiye wuh apne sāth lāe haiñ unheñ qabūl kar.

* 6:5 Yā hawāeñ.

¹¹ Un kī yih sonā-chāndī le kar tāj banā le, phir tāj ko imām-e-āzam Yashua bin Yahūsadaq ke sar par rakh kar

¹² use batā, ‘Rabbul-afwāj farmātā hai ki ek ādmī āne wālā hai jis kā nām koṅpal hai. Us ke sāye meñ bahut koṅpleñ phūṭ nikleṅgī, aur wuh Rab kā ghar tāmīr karegā.

¹³ Hān, wuhī Rab kā ghar banāegā aur shān-o-shaukat ke sāth taḡht par baiṭh kar hukūmat karegā. Wuh imām kī haisiyat se bhī taḡht par baiṭhegā, aur donoñ ohdoñ meñ ittafāq aur salāmatī hogī.’

¹⁴ Tāj ko Hīlam, Tūbiyāh, Yadāyāh aur Hen bin Safaniyāh kī yād meñ Rab ke ghar meñ mahfūz rakhā jāe.

¹⁵ Log dūr-darāz ilāqoñ se ā kar Rab kā ghar tāmīr karne meñ madad kareṅge.”

Tab tum jān loge ki Rabbul-afwāj ne mujhe tumhāre pās bhejā hai. Agar tum dhyān se Rab apne Ḳhudā kī suno to yih sab kuchh pūrā ho jāegā.

7

Tum Merī Sunane se Inkār Karte Ho

¹ Dārā Bādshāh kī hukūmat ke chauthe sāl meñ Rab Zakariyāh se hamkalām huā. Kislew yānī naweñ mahīne kā chauthā din * thā.

² Us waqt Baitel Shahr ne Sarāzar aur Rajamalik ko us ke ādmiyoñ samet Yarūshalam bhejā thā tāki Rab se iltamās kareñ.

³ Sāth sāth unheñ Rabbul-afwāj ke ghar ke imāmoñ ko yih sawāl pesh karnā thā, “Ab ham

* 7:1 4 Disambar.

kaī sāl se pānchweñ mahīne meñ rozā rakh kar Rab ke ghar kī tabāhī par mātām karte āe haiñ. Kyā lāzim hai ki ham yih dastūr āindā bhī jāri rakheñ?”

⁴ Tab mujhe Rabbul-afwāj se jawāb milā,

⁵ “Mulk ke tamām bāshindoñ aur imāmoñ se kah, ‘Beshak tum 70 sāl se pānchweñ aur sātweñ mahīne meñ rozā rakh kar mātām karte āe ho. Lekin kyā tum ne yih dastūr wāqāī merī k̄hātir adā kiyā? Hargiz nahīn!

⁶ Īdoñ par bhī tum khāte-pīte waqt sirf apnī hī k̄hātir k̄hushī manāte ho.

⁷ Yih wuhī bāt hai jo main ne mazī meñ bhī nabiyōñ kī mārifat tumheñ batāī, us waqt jab Yarūshalam meñ ābādī aur sukūn thā, jab gird-o-nawāh ke shahr Dasht-e-Najab aur maḡhrib ke nashebī pahārī ilāqe tak ābād the.’ ”

⁸ Is nāte se Zakariyāh par Rab kā ek aur kalām nāzil huā,

⁹ “Rabbul-afwāj farmātā hai, ‘Adālat meñ munsifānā faisle karo, ek dūsre par mehrbānī aur rahm karo!

¹⁰ Bewāoñ, yatīmoñ, ajnabiyōñ aur ḡharīboñ par zulm mat karnā. Apne dil meñ ek dūsre ke k̄hilāf bure mansūbe na bāndho.’

¹¹ Jab tumhāre bāpdādā ne yih kuchh sunā to wuh is par dhyān dene ke lie taiyār nahīn the balki akār gae. Unhoñ ne apnā muñh dūsri taraf pher kar apne kānoñ ko band kie rakhā.

¹² Unhoñ ne apne diloñ ko hīre kī tarah saḡht kar liyā tāki shariyat aur wuh bāteñ un par asarandāz na ho sakeñ jo Rabbul-afwāj ne apne Rūh ke wasīle se guzashtā nabiyōñ ko batāne ko

kahā thā. Tab Rabbul-afwāj kā shadīd ḡhazab un par nāzil huā.

¹³ Wuh farmātā hai, ‘Chūnki unhoñ ne merī na sunī is lie main ne faislā kiyā ki jab wuh madad ke lie mujh se iltijā karen to main bhī un kī nahīn sunūngā.

¹⁴ Main ne unheñ āndhī se urā kar tamām dīgar aqwām meñ muntashir kar diyā, aisī qaumoñ meñ jin se wuh nāwāqif the. Un ke jāne par watan itnā wīrān-o-sunsān huā ki koī na rahā jo us meñ āe yā wahāñ se jāe. Yoñ unhoñ ne us ḡhushgawār mulk ko tabāh kar diyā.’ ”

8

Ek Nayā Āghāz

¹ Ek bār phir Rabbul-afwāj kā kalām mujh par nāzil huā,

² “Rabbul-afwāj farmātā hai ki main baṛī ḡhairat se Siyyūn ke lie laṛ rahā hūñ, baṛe ḡhusse meñ us ke lie jidd-o-jahd kar rahā hūñ.

³ Rab farmātā hai ki main Siyyūn ke pās wāpas āūngā, dubārā Yarūshalam ke bīch meñ sukūnat karūngā. Tab Yarūshalam ‘Wafādārī kā Shahr’ aur Rabbul-afwāj kā pahāṛ ‘Koh-e-Muqaddas’ kahlāegā.

⁴ Kyoñki Rabbul-afwāj farmātā hai, ‘Buzurg mard-o-ḡhawātīn dubārā Yarūshalam ke chaukoñ meñ baiṭheñge, aur har ek itnā umrrasīdā hogā ki use chhaṛī kā sahārā lenā paṛegā.

⁵ Sāth sāth chauk khel-kūd meñ masrūf laṛkoñ-laṛkiyoñ se bhare raheñge.’

⁶ Rabbul-afwāj farmātā hai, ‘Shāyad yih us waqt bache hue Isrāīliyon ko nāmumkin lage. Lekin kyā aisā kām mere lie jo Rabbul-afwāj hūn nāmumkin hai? Hargiz nahīn!’

⁷ Rabbul-afwāj farmātā hai, ‘Maiñ apnī qaum ko mashriq aur maḡhrib ke mamālik se bachā kar

⁸ wāpas lāūngā, aur wuh Yarūshalam meñ baseṅge. Wahāñ wuh merī qaum hoṅge aur maiñ wafādārī aur insāf ke sāth un kā Ḳhudā hūngā.’

⁹ Rabbul-afwāj farmātā hai, ‘Hauslā rakh kar tāmīrī kām takmīl tak pahuñchāo! Āj bhī tum un bāton par etamād kar sakte ho jo nabiyon ne Rabbul-afwāj ke ghar kī buniyād ḍalte waqt sunāi thiñ.

¹⁰ Yād rahe ki us waqt se pahle na insān aur na haiwān ko mehnat kī mazdūrī miltī thī. Āne jāne wāle kahīn bhī dushman ke hamloñ se mahfūz nahīn the, kyoñki maiñ ne har ādmī ko us ke hamsāye kā dushman banā diyā thā.’

¹¹ Lekin Rabbul-afwāj farmātā hai, ‘Ab se maiñ tum se jo bache hue ho aisā sulūk nahīn karūnga.

¹² Log salāmatī se bīj boeṅge, angūr kī bel waqt par apnā phal lāegī, kheton meñ fasleñ pakeṅgī aur āsmān os paṛne degā. Yih tamām chīzeñ maiñ Yahūdāh ke bache huon ko mīrās meñ dūngā.

¹³ Ai Yahūdāh aur Isrāīl, pahle tum dīgar aqwām meñ lānat kā nishānā ban gae the, lekin ab jab maiñ tumheñ rihā karūnga to tum barkat kā bāis hoge. Ḍaro mat! Hauslā rakho!’

14 Rabbul-afwāj farmātā hai, ‘Pahle jab tumhāre bāpdādā ne mujhe taish dilāyā to main ne tum par āfat lāne kā musammam irādā kar liyā thā aur kabhī na pachhtāyā.

15 Lekin ab main Yarūshalam aur Yahūdāh ko barkat denā chāhtā hūn. Is meñ merā irādā utnā hī pakkā hai jitnā pahle tumheñ nuqsān pahuñchāne meñ pakkā thā. Chunāñche đaro mat!

16 Lekin in bātoñ par dhyān do, ek dūsre se sach bāt karo, adālat meñ sachchāi aur salāmatī par mabnī faisle karo,

17 apne paṛosī ke ḳhilāf bure mansūbe mat bāndho aur jhūṭī ḳasam khāne ke shauḳ se bāz āo. In tamām chīzoñ se main nafrat kartā hūn.’ Yih Rab kā farmān hai.”

18 Ek bār phir Rabbul-afwāj kā kalām mujh par nāzil huā,

19 “Rabbul-afwāj farmātā hai ki āj tak Yahūdāh ke log chauthē, pāñchweñ, sātweñ aur dasweñ mahīne meñ rozā rakh kar mātām karte āe haiñ. Lekin ab se yih auḳāt ḳhushī-o-shādmānī ke mauḳe hoñge jin par jashn manāoge. Lekin sachchāi aur salāmatī ko pyār karo!

20 Rabbul-afwāj farmātā hai ki aisā waḳt āegā jab đigar aḳwām aur muta'addid shahroñ ke log yahāñ āeñge.

21 Ek shahr ke bāshinde dūsre shahr meñ jā kar kaheñge, ‘Āo, ham Yarūshalam jā kar Rab se iltamās kareñ, Rabbul-afwāj kī marzī dariyāft kareñ. Ham bhī jāeñge.’

22 Hāñ, muta'addid aḳwām aur tāḳatwar um-mateñ Yarūshalam āeñgī tāki Rabbul-afwāj kī marzī mālūm kareñ aur us se iltamās kareñ.

²³ Rabbul-afwāj farmātā hai ki un dinon̄ meñ muḳhtalif aqwām aur ahl-e-zabān ke das ādmī ek Yahūdī ke dāman ko pakar kar kaheñge, ‘Hameñ apne sāth chalne deñ, kyon̄ki ham ne sunā hai ki Allāh āp ke sāth hai.’ ”

9

Isrāil ke Dushmanon̄ kī Adālat

¹ Rab kā kalām Mulk-e-Hadrāk ke ḳhilāf hai, aur wuh Damishq par nāzil hogā. Kyon̄ki insān aur Isrāil ke tamām qabīlon̄ kī ānkheñ Rab kī taraf deḳhti haiñ.

² Damishq kī sarhad par wāqe Hamāt balki Sūr aur Saidā bhī is kalām se muta'assir ho jāeñge, ḳhāh wuh kitne dānishmand kyon̄ na hoñ.

³ Beshak Sūr ne apne lie mazbūt qilā banā liyā hai, beshak us ne sone-chāñdī ke aise ḍher lagāe haiñ jaise ām taur par galiyon̄ meñ ret yā kachre ke ḍher lagā lie jāte haiñ.

⁴ Lekin Rab us par qabzā karke us kī fauj ko samundar meñ phaiñk degā. Tab shahr nazar-e-ātish ho jāegā.

⁵ Yih dekh kar Askqalūn ghabrā jāegā aur Ġhazzā tarāp uṭhegā. Aqrūn bhī laraz uṭhegā, kyon̄ki us kī ummīd jāti rahegi. Ġhazzā kā bādshāh halāk aur Askqalūn ḡhairābād ho jāegā.

⁶ Ashdūd meñ do naslon̄ ke log baseñge. Rab farmātā hai, “Jo kuchh Filistiyon̄ ke lie faḳhr kā bāis hai use main̄ miṭā dūngā.

⁷ Maiñ un kī butparastī khatm karūnga. Āindā wuh gosht ko k̄hūn ke sāth aur apnī ghin-aunī qurbāniyān nahīn khāeñge. Tab jo bach jāeñge mere parastār hoñge aur Yahūdāh ke k̄hāndānoñ meñ shāmīl ho jāeñge. Aqrūn ke Filistī yoñ merī qaum meñ shāmīl ho jāeñge jis tarah qadīm zamāne meñ Yabūsī merī qaum meñ shāmīl ho gae.

⁸ Maiñ k̄hud apne ghar kī pahrādārī karūnga tāki āindā jo bhī āte yā jāte waqt wahān se guzare us par hamlā na kare, koī bhī zālīm merī qaum ko tang na kare. Ab se maiñ k̄hud us kī dekh-bhāl karūnga.

Nayā Bādshāh Āne Wālā Hai

⁹ Ai Siyyūn Beṭī, shādiyānā bajā! Ai Yarūshalam Beṭī, shādmānī ke nāre lagā! Dekh, terā bādshāh tere pās ā rahā hai. Wuh rāstbāz aur fathmand hai, wuh halīm hai aur gadhe par, hāñ gadhī ke bachche par sawār hai.

¹⁰ Maiñ Ifrāīm se rath aur Yarūshalam se ghoṛe dūr kar dūngā. Jang kī kamān tūṭ jāegī. Mau'ūdā bādshāh * ke kahne par tamām aqwām meñ salāmatī qāym ho jāegī. Us kī hukūmat ek samundar se dūsre tak aur Dariyā-e-Furāt se duniyā kī intahā tak mānī jāegī.

Rab Apnī Qaum kī Hifāzat Karegā

¹¹ Ai merī qaum, maiñ ne tere sāth ek ahd bāndhā jis kī tasdīq qurbāniyoñ ke k̄hūn se huī, is lie maiñ tere qaidiyoñ ko pānī se mahrūm garhe se rihā karūnga.

* **9:10** Lafzī tarjumā: us ke kahne par.

¹² Ai purummīd qaidiyo, qile ke pās wāpas āo! Kyoñki āj hī main elān kartā hūn ki tumhārī har taklif ke ewaz main tumheñ do barkateñ baḡhsh dūngā.

¹³ Yahūdāh merī kamān hai aur Isrāīl mere tīr jo main dushman ke ḡhilāf chalāūngā. Ai Siyyūn Beṭī, main tere beṭoñ ko Yūnān ke faujiyoñ se larne ke lie bhejūngā, main tujhe sūrme kī talwār kī mānind banā dūngā.”

¹⁴ Tab Rab un par zāhir ho kar bijlī kī tarah apnā tīr chalāegā. Rab Qādir-e-mutlaq narsingā phūñk kar junūbī āñdhiyoñ meñ āegā.

¹⁵ Rabbul-afwāj ḡhud Isrāīliyoñ ko panāh degā. Tab wuh dushman ko khā khā kar us ke phaiñke hue pattharoñ ko ḡhāk meñ milā deñge aur ḡhūn ko mai kī tarah pī pī kar shor machāeñge. Wuh qurbānī ke ḡhūn se bhare kaṭore kī tarah bhar jāeñge, qurbāngāh ke konoñ jaise ḡhūnālūdā ho jāeñge.

¹⁶ Us din Rab un kā ḡhudā unheñ jo us kī qaum kā rewar haiñ chhuṭkārā degā. Tab wuh us ke mulk meñ tāj ke jawāhar kī mānind chamak uṭheñge.

¹⁷ Wuh kitne dilkash aur ḡhūbsūrat lageñge! Anāj aur mai kī kasrat se kuñwāre-kuñwāriyāñ phalne-phulne lageñge.

10

Rab hī Madad Kar Saktā Hai

¹ Bahār ke mausam meñ Rab se bārish māngo. Kyoñki wuhī ghane bādāl banātā hai, wuhī bārish barsā kar har ek ko khet kī hariyālī muhaiyā kartā hai.

² Tumhāre gharoñ ke but fareb dete, tumhāre ghaibdān jhūṭī royā dekhte aur farebdeh khāb sunāte haiñ. Un kī tasallī abas hai. Isī lie qaum ko bheṛ-bakriyoñ kī tarah yahāñ se chalā jānā paṛā. Gallābān nahīñ hai, is lie wuh musībat meñ uljhe rahte haiñ.

Rab Apnī Qaum ko Wāpas Lāegā

³ Rab farmātā hai, “Merī qaum ke gallābānoñ par merā ghazab bharak uṭhā hai, aur jo bakre us kī rāhnumāī kar rahe haiñ unheñ main sazā dūngā. Kyonki Rabbul-afwāj apne rewaṛ Yahūdāh ke gharāne kī dekh-bhāl karegā, use jangī ghore jaisā shāndār banā degā.

⁴ Yahūdāh se kone kā buniyādī patthar, meḳh, jang kī kamān aur tamām hukmrān nikal āenge.

⁵ Sab sūrme kī mānind hoñge jo larṭe waqt dushman ko galī ke kachre meñ kuchal denge. Rabbul-afwāj un ke sāth hogā, is lie wuh laṛ kar ghālib āenge. Muḳhālif ghurṣawāroñ kī baṛī ruswāī hogī.

⁶ Main Yahūdāh ke gharāne ko taqwiyat dūngā, Yūsuf ke gharāne ko chhuṭkārā dūngā, hāñ un par rahm karke unheñ dubārā watan meñ basā dūngā. Tab un kī hālat se patā nahīñ chalegā ki main ne kabhī unheñ radd kiyā thā. Kyonki main Rab un kā Ḳhudā hūñ, main hī un kī sunūngā.

⁷ Ifrāim ke afrād sūrme se ban jāenge, wuh yoñ khush ho jāenge jis tarah dil mai pīne se khush ho jātā hai. Un ke bachche yih dekh kar bāgh bāgh ho jāenge, un ke dil Rab kī khushī manāenge.

⁸ Maiñ sītī bajā kar unheñ jamā karūnga, kyonki maiñ ne fidyā de kar unheñ āzād kar diyā hai. Tab wuh pahle kī tarah beshumār ho jāeñge.

⁹ Maiñ unheñ bīj kī tarah mukhtalif qaumoñ meñ bo kar muntashir kar dūngā, lekin dūr-darāz ilāqoñ meñ wuh mujhe yād kareñge. Aur ek din wuh apnī aulād samet bach kar wāpas āeñge.

¹⁰ Maiñ unheñ Misr se wāpas lāūngā, Asūr se ikatṭhā karūnga. Maiñ unheñ Jiliyād aur Lubnān meñ lāūngā, to bhī un ke lie jagah kāfi nahīn hogī.

¹¹ Jab wuh musibat ke samundar meñ se guzareñge to Rab maujoñ ko yoñ māregā ki sab kuchh pānī kī gahrāiyōñ tak kḥushk ho jāegā. Asūr kā fakhr kḥāk meñ mil jāegā, aur Misr kā shāhī asā dūr ho jāegā.

¹² Maiñ apnī qaum ko Rab meñ taqwiyat dūngā, aur wuh us kā hī nām le kar zindagī guzareñge.” Yih Rab kā farmān hai.

11

Baroñ ko Nīchā Kiyā Jāegā

¹ Ai Lubnān, apne darwāzoñ ko khol de tāki tere deodār ke daraḳht nazar-e-ātish ho jāeñ.

² Ai jūnīpar ke daraḳhto, wāwailā karo! Kyonki deodār ke daraḳht gir gae haiñ, yih zabardast daraḳht tabāh ho gae haiñ. Ai Basan ke balūto, āh-o-zārī karo! Jo jangal itnā ghanā thā ki koī us meñ se guzar na saktā thā use kāṭā gayā hai.

³ Suno, charwāhe ro rahe haiñ, kyonki un kī shāndār charāgāheñ barbād ho gai haiñ. Suno, jawān sherbabar dahār rahe haiñ, kyonki Wādī-e-Yardan kā gunjān jangal khatm ho gayā hai.

Do Qism ke Gallābān

⁴ Rab merā Kḥudā mujh se hamkalām huā, “Zabah hone wālī bheṛ-bakriyon kī gallābānī kar!

⁵ Jo unheñ kharīd lete wuh unheñ zabah karte haiñ aur qusūrwar nahīn ṭhaharte. Aur jo unheñ bechte wuh kahte haiñ, ‘Allāh kī hamd ho, maiñ amīr ho gayā hūñ!’ Un ke apne charwāhe un par tars nahīn khāte.

⁶ Is lie Rab farmātā hai ki maiñ bhī mulk ke bāshindoñ par tars nahīn khāūngā. Maiñ har ek ko us ke paṛosī aur us ke bādshāh ke hawāle karūngā. Wuh mulk ko ṭukre ṭukre kareñge, aur maiñ unheñ un ke hāth se nahīn chhurāūngā.”

⁷ Chunāñche maiñ, Zakariyāh ne saudāgaron ke lie zabah hone wālī bheṛ-bakriyon kī gallābānī kī. Maiñ ne us kām ke lie do lāṭhiyāñ līñ. Ek kā nām ‘Mehrbānī’ aur dūsri kā nām ‘Yagāngat’ thā. Un ke sāth maiñ ne rewaṛ kī gallābānī kī.

⁸ Ek hī mahīne meñ maiñ ne tīn gallābānoñ ko miṭā diyā. Lekin jald hī maiñ bheṛ-bakriyon se tang ā gayā, aur unhoñ ne mujhe bhī haqīr jānā.

⁹ Tab maiñ bolā, “Āindā maiñ tumhāri gallābānī nahīn karūngā. Jise marnā hai wuh mare, jise zāe honā hai wuh zāe ho jāe. Aur jo

bach jāēñ wuh ek dūsre kā gosht khāēñ. Maiñ zimmedār nahīñ hūngā!” *

¹⁰ Maiñ ne lāthī banām ‘Mehrbānī’ ko toṛ kar zāhir kiyā ki jo ahd maiñ ne tamām aqwām ke sāth bāndhā thā wuh mansūkh hai.

¹¹ Usī din wuh mansūkh huā.

Tab bher-bakriyon ke jo saudāgar mujh par dhyān de rahe the unhoñ ne jāñ liyā ki yih paighām Rab kī taraf se hai.

¹² Phir maiñ ne un se kahā, “Agar yih āp ko munāsib lage to mujhe mazdūrī ke paise de deñ, warnā rahne deñ.” Unhoñ ne mazdūrī ke lie mujhe chāndī ke 30 sikke de die.

¹³ Tab Rab ne mujhe hukm diyā, “Ab yih raqam kumhār † ke sāmne phaiñk de. Kitnī shāndār raqam hai! Yih merī itnī hī qadar karte haiñ.” Maiñ ne chāndī ke 30 sikke le kar Rab ke ghar meñ kumhār ke sāmne phaiñk die.

¹⁴ Is ke bād maiñ ne dūsri lāthī banām ‘Yagāngat’ ko toṛ kar zāhir kiyā ki Yahūdāh aur Isrāil kī akhuwwat mansūkh ho gāi hai.

¹⁵ Phir Rab ne mujhe batāyā, “Ab dubārā gallābān kā sāmān le le. Lekin is bār ahmaq charwāhe kā-sā rawaiyā apnā le.

¹⁶ Kyonki maiñ mulk par aisā gallābān muqarrar karūngā jo na halāk hone wāloñ kī dekh-bhāl karegā, na chhoṭoñ ko talāsh karegā, na zaḥmiyon ko shafā degā, na sehhatmandoñ ko ḳhurāk muhaiyā karegā. Is ke bajāe wuh behtarīn jānwaroñ kā gosht khā legā balki itnā zālīm hogā ki un ke khuroñ ko phār kar toṛegā.

* **11:9** ‘Maiñ zimmedār nahīñ hūngā’ izāfā hai tāki matlab sāf ho. † **11:13** Yā dhāt ḳhālne wāle.

¹⁷ Us bekār charwāhe par afsos jo apne rewaṛ ko chhoṛ detā hai. Talwār us ke bāzū aur dahnī ānkh ko zaḥmī kare. Us kā bāzū sūkh jāe aur us kī dahnī ānkh andhī ho jāe.”

12

Allāh Yarūshalam kī Hifāzat Karegā

¹ Zail meñ Rab kā Isrāīl ke lie kalām hai. Rab jis ne āsmān ko khaime kī tarah tān kar zamīn kī buniyādeñ rakhīñ aur insān ke andar us kī rūh ko tashkīl diyā wuh farmātā hai,

² “Maiñ Yarūshalam ko gird-o-nawāh kī qaumon ke lie sharāb kā pyālā banā dūngā jise wuh pī kar larḥarāne lageñgī. Yahūdāh bhī musibat meñ āegā jab Yarūshalam kā muhāsarā kiyā jāegā.

³ Us din duniyā kī tamām aqwām Yarūshalam ke kḥilāf jamā ho jāeñgī. Tab maiñ Yarūshalam ko ek aisā patthar banāūngā jo koī nahīñ uṭhā sakegā. Jo bhī use uṭhā kar le jānā chāhe wuh zaḥmī ho jāegā.”

⁴ Rab farmātā hai, “Us din maiñ tamām ghoṛoñ meñ abtarī aur un ke sawāroñ meñ dīwānagī paidā karūngā. Maiñ dīgar aqwām ke tamām ghoṛoñ ko andhā kar dūngā.

Sāth sāth maiñ khulī ānkhon se Yahūdāh ke gharāne kī dekh-bhāl karūngā.

⁵ Tab Yahūdāh ke kḥāndān dil meñ kaheñge, ‘Yarūshalam ke bāshinde is lie hamāre lie quwwat kā bāis haiñ kī Rabbul-afwāj un kā Kḥudā hai.’

⁶ Us din maiñ Yahūdāh ke kḥāndānoñ ko jalte hue koele banā dūngā jo dushman kī sūkhī

lakaṛī ko jalā deṅge. Wuh bharaktī huī mashāl hoṅge jo dushman kī pūloṅ ko bhasm karegī. Un ke dāīn aur bāīn taraf jitnī bhī qaumeṅ gird-onawāh meṅ rahtī haiṅ wuh sab nazar-e-ātish ho jāeṅgī. Lekin Yarūshalam apnī hī jagah mahfūz rahegā.

⁷ Pahle Rab Yahūdāh ke gharoṅ ko bachāegā tāki Dāūd ke gharāne aur Yarūshalam ke bāshindoṅ kī shān-o-shaukat Yahūdāh se baṛī na ho.

⁸ Lekin Rab Yarūshalam ke bāshindoṅ ko bhī panāh degā. Tab un meṅ se kamzor ādmī Dāūd jaisā sūrmā hogā jabki Dāūd kā gharānā Ḳhudā kī mānind, un ke āge chalne wāle Rab ke farishte kī mānind hogā.

⁹ Us din maiṅ Yarūshalam par hamlā-āwar tamām aqwām ko tabāh karne ke lie niklūngā.

Yarūshalam kā Mātam

¹⁰ Maiṅ Dāūd ke gharāne aur Yarūshalam ke bāshindoṅ par mehrbānī aur iltamās kā Rūh unḍelūngā. Tab wuh mujh par nazar ḍāleṅge jise unhoṅ ne chhedā hai, aur wuh us ke lie aisā mātam kareṅge jaise apne iklaute beṭe ke lie, us ke lie aisā shadīd ḡham khāeṅge jis tarah apne pahlauṭhe ke lie.

¹¹ Us din log Yarūshalam meṅ shiddat se mātam kareṅge. Aisā mātam hogā jaisā Maidān-e-Majiddo meṅ Hadad-rimmon par kiyā jātā thā.

¹²⁻¹⁴ Pūre kā pūrā mulk wāwailā karegā. Tamām ḡhāndān ek dūsre se alag aur tamām aurateṅ dūsroṅ se alag āh-o-bukā kareṅgī. Dāūd kā ḡhāndān, Nātan kā ḡhāndān, Lāwī kā

ḳhāndān, Simāi kā ḳhāndān aur mulk ke bāqī tamām ḳhāndān alag alag mātām kareṅge.

13

Butparastī aur Jhūṭī Nabuwwat kā Ḳhātmā

¹ Us din Dāūd ke gharāne aur Yarūshalam ke bāshindoṅ ke lie chashmā kholā jāegā jis ke zariye wuh apne gunāhoṅ aur nāpākī ko dūr kar sakeṅge.”

² Rabbul-afwāj farmātā hai, “Us din main tamām butoṅ ko mulk meṅ se miṭā dūngā. Un kā nām-o-nishān tak nahīn rahegā, aur wuh kisī ko yād nahīn raheṅge.

Nabiyōṅ aur nāpākī kī rūh ko bhī main mulk se dūr karūngā.

³ Is ke bād agar koī nabuwwat kare to us ke apne mān-bāp us se kaheṅge, ‘Tū zindā nahīn rah saktā, kyonki tū ne Rab kā nām le kar jhūṭ bolā hai.’ Jab wuh peshgoiyān sunāegā to us ke apne wālidāin use chhed dāleṅge.

⁴ Us waqt har nabī ko apnī royā par sharm āegī jab nabuwwat karegā. Wuh nabī kā bāloṅ se banā libās nahīn pahnegā tāki fareb de

⁵ balki kahegā, ‘Main nabī nahīn balki kāshatkār hūn. Jawānī se hī merā peshā khetībārī rahā hai.’

⁶ Agar koī pūchhe, ‘To phir tere sīne par zaḳhmoṅ ke nishān kis tarah lage? To jawāb degā, main apne dostoṅ ke ghar meṅ zaḳhmī huā.’ ”

Logoṅ kī Jānch-Partāl

⁷ Rabbul-afwāj farmātā hai, “Ai talwār, jāg uṭh. Mere gallābān par hamlā kar, us par jo mere qarīb hai. Gallābān ko mār ḍāl tāki bheṛ-bakriyān titar-bitar ho jāeñ. Maiñ ḵhud apne hāth ko chhoṭoñ ke ḵhilāf uṭhāūngā.”

⁸ Rab farmātā hai, “Pūre mulk meñ logoñ ke tīn hissoñ meñ se do hissoñ ko miṭāyā jāegā. Do hisse halāk ho jāeñge aur sirf ek hī hissā bachā rahegā.

⁹ Is bache hue hisse ko maiñ āg meñ ḍāl kar chāñdī yā sone kī tarah pāk-sāf karūngā. Tab wuh merā nām pukāreñge, aur maiñ un kī sunūngā. Maiñ kahūngā, ‘Yih merī qaum hai,’ aur wuh kaheñge, ‘Rab hamārā Ḵhudā hai.’ ”

14

Rab Ḵhud Yarūshalam meñ Bādshāh Hogā

¹ Ai Yarūshalam, Rab kā wuh din āne wālā hai jab dushman terā māl lūṭ kar tere darmiyān hī use āpas meñ taqsīm karegā.

² Kyonki maiñ tamām aqwām ko Yarūshalam se laṛne ke lie jamā karūngā. Shahr dushman ke qabze meñ āegā, gharoñ ko lūṭ liyā jāegā aur auratoñ kī ismatdarī kī jāegī. Shahr ke ādhe bāshinde jilāwatan ho jāeñge, lekin bāqī hissā us meñ zindā chhoṛā jāegā.

³ Lekin phir Rab ḵhud nikal kar in aqwām se yoñ laṛegā jis tarah tab laṛtā hai jab kabhī maidān-e-jang meñ ā jātā hai.

⁴ Us din us ke pānw Yarūshalam ke mashriq meñ Zaitūn ke pahār par ḵaṛe hoñge. Tab pahār phaṭ jāegā. Us kā ek hissā shimāl kī taraf

aur dūsra junūb kī taraf khisak jāegā. Bīch meñ mashriq se maḡhrib kī taraf ek baṛī wādī paidā ho jāegī.

⁵ Tum mere pahāron kī is wādī meñ bhāg kar panāh loge, kyonki yih āzal tak pahuñchāegī. Jis tarah tum Yahūdāh ke bādshāh Uzziyāh ke aiyām meñ apne āp ko zalzale se bachāne ke lie Yarūshalam se bhāg nikle the usī tarah tum mazkūrā wādī meñ dauṛ āoge. Tab Rab merā Ḳhudā āegā, aur tamām muqaddasīn us ke sāth hoñge.

⁶ Us din na taptī garmī hogī, na sardī yā pālā.

⁷ Wuh ek munfarid din hogā jo Rab hī ko mālūm hogā. Na din hogā aur na rāt balki shām ko bhī raushnī hogī.

⁸ Us din Yarūshalam se zindagī kā pānī bah niklegā. Us kī ek shākh mashriq ke Bahīrā-e-Murdār kī taraf aur dūsri shākh maḡhrib ke samundar kī taraf bahegī. Is pānī meñ na garmiyon meñ, na sardiyon meñ kabhī kamī hogī.

⁹ Rab pūrī duniyā kā Bādshāh hogā. Us din Rab wāhid Ḳhudā hogā, log sirf usī ke nām kī parastish kareñge.

¹⁰ Pūrā mulk shimālī shahr Jibā se le kar Yarūshalam ke junūb meñ wāqe shahr Rimmon tak khulā maidān ban jāegā. Sirf Yarūshalam apnī hī ūñchī jagah par rahegā. Us kī purānī hudūd bhī qāym raheñgī yānī Binyamīn ke Darwāze se le kar purāne darwāze aur Kone ke Darwāze tak, phir Hananel ke Burj se le kar us jagah tak jahān shāhī mai banāi jāti hai.

¹¹ Log us meñ baseñge, aur āindā use kabhī pūrī tabāhī ke lie maḵhsūs nahīn kiyā jāegā. Yarūshalam mahfūz jagah rahegī.

¹² Lekin jo qaumeñ Yarūshalam se laṛne nikleñ un par Rab ek haulnāk bīmārī lāegā. Log abhī khare ho sakeñge ki un ke jism saṛ jāeñge. Ānkheñ apne ḵhānoñ meñ aur zabān muñh meñ gal jāegī.

¹³ Us din Rab un meñ baṛī abtarī paidā karegā. Har ek apne sāthī kā hāth pakaṛ kar us par hamlā karegā.

¹⁴ Yahūdāh bhī Yarūshalam se * laṛegā. Tamām paṛosī aqwām kī daulat wahāñ jamā ho jāegī yāñī kasrat kā sonā, chāñdī aur kapṛe.

¹⁵ Na sirf insān mohlak bīmārī kī zad meñ āegā balki jāñwar bhī. Ghore, ḵhachchar, ūñṭ, gadhe aur bāqī jitne jāñwar un lashkargāhoñ meñ hoñge un sab par yihī āfat āegī.

Tamām Aqwām Yarūshalam meñ Īd Manāeñgī

¹⁶ To bhī un tamām aqwām ke kuchh log bach jāeñge jinhoñ ne Yarūshalam par hamlā kiyā thā. Ab wuh sāl basāl Yarūshalam āte raheñge tāki hamāre Bādshāh Rabbul-afwāj kī parastish kareñ aur Jhoñpriyoñ kī Īd manāeñ.

¹⁷ Jab kabhī duniyā kī tamām aqwām meñ se koī hamāre Bādshāh Rabbul-afwāj ko sijdā karne ke lie Yarūshalam na āe to us kā mulk bārish se mahrūm rahegā.

¹⁸ Agar Mīsri qaum Yarūshalam na āe aur hissā na le to wuh bārish se mahrūm rahegī. Yoñ

* **14:14** Yā meñ.

Rab un qaumoñ ko sazā degā jo Jhoñpṛiyon̄ kī Īd manāne ke lie Yarūshalam nahīn āēngī.

¹⁹ Jitnī bhī qaumeñ Jhoñpṛiyon̄ kī Īd manāne ke lie Yarūshalam na āēñ unheñ yihī sazā milegī, ḳhāh Misr ho yā koī aur qaum.

²⁰ Us din ghoṛon̄ kī ghanṭiyon̄ par likhā hogā, “Rab ke lie Maḳhsūs-o-Muḳaddas.” Aur Rab ke ghar kī degeñ un muḳaddas kaṭoron̄ ke barābar hoñgī jo qurbāngāh ke sāmne istemāl hote haiñ.

²¹ Hāñ, Yarūshalam aur Yahūdāh meñ maujūd har deg Rabbul-afwāj ke lie maḳhsūs-o-muḳaddas hogī. Jo bhī qurbāniyāñ pesh karne ke lie Yarūshalam āe wuh unheñ apnī qurbāniyāñ pakāne ke lie istemāl karegā. Us din se Rabbul-afwāj ke ghar meñ koī bhī saudāgar pāyā nahīn jāegā.

xxx

Kitab-i Muqaddas
The Holy Bible in Urdu, Urdu Geo Version, Roman
Script

copyright © 2019 Urdu Geo Version

Language: (Urdu)

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2024-09-20

PDF generated using Haiola and XeLaTeX on 1 Oct 2024 from source files dated 20 Sep 2024

123ff8cb-27b3-5817-a02a-22e67145fd30